

TSCHANTAMAINTS DAL CUMÜN DA VASCHINS DA ZERNEZ

I. DISPOSIZIUNS GENERALAS

Art. 1

Posiziun giuridica

Il cumün da vaschins da Zernez es üna corporaziun dal dret public chi consista dals vaschins da Zernez chi han domicil sül territori dal cumün politic da Zernez.

Art. 2

Administraziun autonoma

l'ls limits da la legislaziun federala e chantunala ha il cumün da vaschins il dret dad üna administraziun autonoma.

Art. 3

Dret subsidiar

Per quant cha quists tschantamaints nu cuntregnan ingünas regulaziuns, vegnan applichadas in sen analog las disposiziuns da la constituziun cumünala dal cumün politic da Zernez, sco eir da la ledscha chantunala da cumüns.

Art. 4

Lingua ufficiala

Il rumantsch vallader es la lingua ufficiala dal cumün da vaschins da Zernez.

Art. 5

Chomp d'actività

Il chomp d'actività dal cumün da vaschins vegn determinà illa ledscha chantunala da cumüns e cumpiglia las cumpetenzas nomnadas là chi sun colliadas surtuot cul conceder drets da vaschinadi e cun la surveglianza dal possess dals vaschins.

Art. 6

Egualità da schlattas

Las indicaziuns davart las persunas e las funcziuns in quists tschantamaints as referischan ad amenduos schlattas tant inavant chi nu resulta alch oter our dal sen dals tschantamaints.

Art. 7

Dret da vuschar

Dret da vuschar in affars dal cumün da vaschins da Zernez ha mincha vaschin chi'd es abel da vuschar e chi'd es domicilià sün territori dal cumün politic da Zernez.

Art. 8

Elegibilità

Minchün chi ha il dret da vuschar in affars dal cumün da vaschins da Zernez, po eir gnir tschernü in ün'instanza dal cumün da vaschins, scha sia elegibilità nun es esclusa tras sentenzcha penala.

Art. 9

Perioda d'uffizi e successiun

La perioda d'uffizi düra trais ons. Mincha uffiziant es reelegibel. Scha ün uffiziant sorta da seis uffizi d'urant ils prüms duos ons da la perioda d'uffizi sto gnir fatta üna elecziun da substituziun. Per regla po ün uffiziant sortir adüna sülla fin da l'on.

Las periodas d'uffizi dal president ed ün commember da suprastanza, dals trais ulteriurs suprastants e da la cumischiun sindicatoria as spostan adüna per ün on da maniera chi dovra minch'on üna radunanza da tschernas.

La remuneraziun dals uffiziants dal cumün da vaschins as basa sül reglamaint da remuneraziun dal cumün politic.

Art. 10

Termin da tschernas ed entrada in uffizi

La radunanza annuala electorala dal cumün da vaschins ha lö minch'on avant ils 1. december. La saramentaziun vegn fatta subit davo la tscherna e l'entrada in uffizi es als 1. schner.

Art. 11

Dret da petiziun

Mincha vaschin po inoltrar a la suprastanza dals vaschins üna petiziun. Quella sto gnir formulada in scrit e sto gnir tramissa al president dals vaschins. La suprastanza sto trattar quella infra quatter mais.

Art. 12

Dret d'iniziativa

25 vaschins cun dret da vuschar in fatschendas dal cumün da vaschins han il dret dad inoltrar üna iniziativa. Las iniciativas vegnan trattadas tenor la constituziun cumünala dal cumün politic.

II. ORGANISAZIUN

Art. 13

Organs

Ils organs dal cumün da vaschins sun:

- a) la radunanza da vaschins
- b) la suprastanza da vaschins
- c) la cumischiun sindicatoria dals vaschins

Art. 14

Radunanza da vaschins
e sias cumpetenzas

La radunanza da vaschins es l'organ superior e legislativ dal cumün da vaschins.

La radunanza da vaschins vain bannida da la suprastanza da vaschins. La bannida vain publichada almain 5 dis da lavur avant il termin da radunanza. La radunanza po decider be davart fatschendas tractandadas. Ella vain convochada tenor bsögn, ma as raduna almain üna vouta l'on per üna radunanza annuala electorala.

Las cumpetenzas da la radunanza da vaschins sun las seguaintas:

- a) relaschar e reveder ils tschantamaints dal cumün da vaschins.
- b) tscherner las instanzas dal cumün da vaschins.
- c) conceder ils drets da vaschinadi e da vaschinadi d'onur tenor la ledscha davart il dret da vaschinadi.
- d) decider davart dumondas per vender, impegnar o agravar permanentamaing il possess funsil ed immobigliar dal cumün da vaschins e stipular contrats plü lungs co 12 ons in connex cun quel. Quistas dumondas vegnan trattadas in prüma lingia sün giavüsch e cul acconsentimaint da las instanzas cumpetentas dal cumün politic chi ha la giodia dal possess dal cumün da vaschins.
- e) da dar l'acconsentimaint per retrar mez our dal quint da rechav da bains vendüts, schi'd es perscrit tenor dret chantunal la collavuraziun dal cumün da vaschins.
- f) da decider expensas chi surpassan la cumpetenzza da la suprastanza.
- g) da dar procura per process ed accumodamaints, scha la valur da gestiun surpassa 10000 francs.
- h) d'approvar eventualmaing il quint dal cumün da vaschins.
- i) decider da schogliar il cumün da vaschins e surdar sias lezchas e seis possess al cumün politic.

Art. 15

Suprastanza da vaschins La suprastanza da vaschins es l'organ executiv ed administrativ dal cumün da vaschins.

La suprastanza da vaschins as cumpuona da tschinch commembers chi occupan las plaivs dal president, dal vicepresidente, da l'actuar e da duos assessuors.

Il president vain tschernü da la radunanza ed il ulteriurs quatter commembers as constituischan sves.

Art. 16

Tschantadas

Las tschantadas da la suprastanza da vaschins vegnan convocadas dal president o dal vicepresidente uschè suvent cha'ls affars dumondan que, però almain üna vouta l'on per preparar la radunanza annuala.

La bannida culla documentaziun necessaria per las tractandas dad üna tschantada vegn fatta in scrit. Almain trais commembers ston esser preschaints per trar decisiuns. Decisas pon gnir be chosas tractandadas. Per tuot las decisiuns vala la pluralità da vuschs. Pro parità da vuschs sto la decisiun gnir suspaisa fin cha'l cussagl da vaschins es cumplet e schi nu's po spettar ha il president la vusch da tagl.

Art. 17

Cumpetenzas

La suprastanza da vaschins ha tuot las cumpetenzas chi nu sun delegadas tras dret federal o chantunal o tras ils tschantamaints ad ün'oter organ. Ella ha il dret d'ingaschar eir a cumischiuns o dad inchargiar a la radunanza da vaschins cun singulas incumbenzas.

La cumpetenzza finanziaria da la suprastanza da vaschins importa Fr. 10'000.- per cas singuls ed importa Fr. 3000.- schi's tratta dad expensas periodicas.

A la suprastanza da vaschins suprastà impustüt:

- a) d'applichar ed executar decrets e uordens superiors sco eir quels dal cumün da vaschins, sco eir las decisiuns da la radunanza da vaschins.
- b) da tegner in ögl l'administraziun dal possess immobiligiar e funsil dal cumün da vaschins chi vegn fatta dal cumün politic e pisserar chi nu vegnan surpassadas las cumpetenzas in cas chi douvra la decisiun da la radunanza da vaschins.

- c) da predeliberar tuottas fatschendas chi han da gnir suottamissas a la radunanza da vaschins e far las propostas correspudentas a man da quella.
- d) da decider schi saja da manar ün process, da far recuors o accommodamaints e da stipular contrats arbitrars.
- e) da rapreschantar il cumün da vaschins vers terzas persunas ed avant güdisch.

Art. 18

*La cumischiun
sindicatoria dals vaschins*

La cumischiun sindicatoria es l'organ da controlla dal cumün da vaschins. Ella es tuottafat independenta e respunsabla per sias activitats unicamaing invers la radunanza da vaschins.

La cumischiun sindicatoria as cumpuona da duos commembers ed ün suppleant. La cumischiun examinescha sper ün eventual rendaquint eir las decisiuns da la suprastanza, ma eir quellas dal cumün politic in regard il possess dals vaschins.

III. ADMINISTRAZIUN DA LA FACULTÀ

Art. 19

Administraziun

Il possess e la facultà dal cumün da vaschins vegnan administrats dal cumün politic chi ha la godia da tuot il possess dal cumün da vaschins. Schi nu vain manada üna chascha separada per possess liquid dals vaschins surpiglia il cumün politic dimena eir las spaisas necessarias per la gestiun dal cumün da vaschins. Las spaisas consistan da la remuneraziun e las spaisas dad organs dal cumün da vaschins chi resultan pustüt cun trattar dumondas da vaschinadi e dumondas in connex culla survaglianza dal possess dals vaschins. Schi nu vegnan manadas chaschas separadas vegnan missas las entradas dal cumün da vaschins, sco taxas per acquistar drets da vaschinadi o rechavs da vendita da terrain illa chascha dal cumün politic. Il cumün politic sto manar contos o eir üna chascha separada pels mezs dal cumün da vaschins, ma causa cha'l cumün politic ha la godia dals bains es el in dovair da manar eir la chascha.

IV. DISPOSIZIUNS FINALAS

Art. 20

*Revisiun
dals tschantamaints*

Quists tschantamaints pon gnir suottamiss da tuots temps ad üna revisiun parziala o totala. Ils tschantamaints pon gnir revais o abolits be tras decisiun da la radunanza da vaschins.

Art. 20

Vigur

Quists tschantamaints sun gnüts approvats da la radunanza da vaschins dals 19 november 2014. Els sun da suottametter a la Regenza grischuna per gnir approvats ed examinats regard lur legalità. Que vala eir per mincha revisiun o amplificaziun dals tschantamaints. Quists tschantamaints aintran in vigur als 1. da schner dal 2015. Que es eir la data da la naschentscha dal nouv cumün da vaschins da Zernez chi as fuorma da la fusiun dals cumüns da vaschins da Zernez e da Susch insembel culs vaschins da Lavin.

Art. 21

*Derogar disposiziuns
plü veglias*

Quists tschantamaints rimplazzan tuot las disposiziuns plü veglias dals anteriurs cumüns da vaschins da Zernez, da Susch e da Lavin.

Il president dal di:

Hermann Thom

l'actuar dal di:

Reto Juon

Approvà da la Regenza als/ protocol no.

Il president:

il chancelier: